

07/08/2003

Kerajaan tidak akan halang kunjungi Indonesia

PUTRAJAYA: Malaysia tidak bercadang mengeluarkan amaran atau nasihat perjalanan kepada rakyat negara ini yang mahu mengunjungi Indonesia berikutan kejadian serangan bom di sebuah hotel di Jakarta kelmarin.

Menteri Luar, Datuk Seri Syed Hamid Albar, berkata serangan terbaru itu tidak harus dijadikan alasan untuk mana-mana negara memperluaskan doktrin pre-emptive kerana kedaulatan Indonesia harus dihormati.

Bagaimanapun, katanya, Malaysia sedia menyalurkan sebarang bantuan kepada negara itu jika diperlukan berikutan ancaman keganasan tidak mungkin ditangani sesebuah negara secara berseorangan.

"Ketika ini tidak perlu kerajaan mengeluarkan amaran perjalanan. Saya berpendapat kerajaan Indonesia tahu melaksanakan siasatan. Ia terpulang kepada pihak Indonesia mengambil tindakan yang dirasakan sesuai.

"Indonesia adalah sebuah negara yang besar dan mempunyai banyak masalah dalaman yang perlu ditangani. Saya berpendapat mereka tidak akan suka campur tangan luar.

"Apa saja yang dapat kita lakukan, kerajaan Indonesia boleh minta menerusi saluran yang ada tetapi saya berpendapat mereka dapat menangani kejadian ini dan membawa mereka yang terbabit ke muka pengadilan," katanya.

Beliau berkata demikian pada sidang media selepas menerima sumbangan RM100,000 daripada pelbagai organisasi korporat bagi membantu membina masjid di kampung Phun Ta Phrom Pry Noub, Kemboja di Wisma Putra, petang semalam. Kutipan derma itu untuk kampung daif itu diusahakan Yayasan Belia Malaysia (YBM).

Syed Hamid berharap pihak berkuasa Indonesia dapat menyelesaikan siasatan kejadian itu dan menahan mereka terbabit secepat mungkin supaya keyakinan dunia terhadap rantau ini yang baru pulih daripada kesan Sindrom Pernafasan Yang Teruk (SARS) tidak terjejas.

"Kita akan memerhati keadaan di Indonesia dari dekat dan mengikuti laporan daripada kedutaan kita.

"Kita sedih dengan kejadian ini. Kita menyampaikan takziah kepada keluarga mereka yang terkorban dan berharap kerajaan Indonesia dapat menangani sebarang masalah berikutan kejadian ini.

"Untuk kepentingan Indonesia dan Asean kita tidak harus memburukkan keadaan dan harus membiarkan pihak berkuasa Indonesia menangani keadaan dengan cara yang dirasakan terbaik," katanya.

Beliau juga menasihatkan rakyat Malaysia yang berada di negara itu supaya sentiasa berhubung dengan pihak kedutaan.

Dalam perkembangan lain, Syed Hamid mengaku Presiden Russia, Vladimir Putin ada menyatakan hasrat negara itu untuk menjadi anggota Pertubuhan Persidangan Islam (OIC) atau pemerhati berikutan negara itu mempunyai kira-kira 20 juta umat Islam.

Katanya, permintaan Putin itu turut dibincangkan dalam pertemuan dengan Perdana Menteri, Datuk Seri Dr Mahathir Mohamad dan ketika kunjungan hormat Timbalan Perdana Menteri, Datuk Seri Abdullah Ahmad Badawi.